



Sesida dals

10 da zercladur 2024

Communitgà ils

12 da zercladur 2024

Protocol nr.

500/2024

Dumonda da la fracziun da l'Alleanza dal Center

concernent l'iniziativa dal pievel «Per l'avegnir da nossa natira e da nossa cuntrada
(Iniziativa da la biodiversitad)» (emprima sutsegnadra Messmer-Blumer)

Resposta da la Regenza

L'Iniziativa da la biodiversitad vul obligar la Confederaziun ed ils chantuns da proteger meglier la biodiversitad, la cuntrada ed il patrimoni construì ed ella pretenda dapli surfatschas sco er dapli meds finansials per la biodiversitad. La Regenza sustegna la finamira effectiva da l'Iniziativa da la biodiversitad, da mantegnair e promover la biodiversitad sco resursa impurtanta. Sin fundament da la gronda impurtanza da questa finamira ha ella integrà en il Program da la Regenza 2021–2024 in punct central da svilup (PS 9.1) ed incumbensà l'administraziun da sviluppar ina Strategia da biodiversitad per il Grischun (SBD GR). La Regenza ha deliberà la SBD GR ils 16 d'avrigl 2024. La basa per la SBD GR è stada ina analisa detagliada dal stadi actual da la biodiversitad en il Grischun. Ella è vegnida elavurada cun tut las datas disponiblas e cun savida supplementara d'expertas e d'experts. Questa analisa mussa, ch'ils pli gronds deficits ecologics existan tar ils spazis da viver liads a l'aua sco er en las vals ed en regiuns favuraivlas. En las regiuns pli autas ha il chantun percenter anc adina ina biodiversitad ritga da relativamain buna qualitad. La gronda sfida è ussa quella d'almain mitigiar en il rom da las pussaivladads ils deficits constatads e cunzunt er da mantegnair las bleras qualitads ecologicas ch'existan anc. Per pudair far frunt en moda efficazia a las sfidas existentas, ha la Regenza concludì 28 mesiras per l'emprima fasa da realisaziun da la SBD GR. La realisaziun da las mesiras dependa fermamain da la dumonda, schebain la Confederaziun ed il chantun pon metter a disposiziun las resursas necessarias e cunzunt er da la prontezza e da las pussaivladads dals partenaris da cooperar activamain vi da la realisaziun da las mesiras. Partenaris èn las vischnancas, organisaziuns ed uniuns, interpresas, personas spezialisadas sco er personas privatas.

La SBD GR ha in'autra orientaziun che l'Iniziativa da la biodiversitad. Ella integrescha tut ils partenaris interessads e cuntanscha uschia sin basa facultativa l'effect necessari, enstagl da far diever da prescripziuns e scumonds supplementars. Davart

l'Iniziativa da la biodiversitad sin plaun federal ha la Regenza exprimì sia tenuta negativa en il rom da la consultaziun tar la cuntraproposta indirecta dal Cussegl federal. Tenor l'opiniun da la Regenza n'èsi numnadamain ni cunvegner da vulair augmentar la cumpart da las surfatschas protegidas sin ina tscherta procentuala, ni adequat d'introducir novs scumonds e prescripziuns dal dretg federal.

Tar la dumonda 1: En cas d'in eventual «gea» a l'iniziativa dependessan las consequenzas fermamain da la concepziun da las disposiziuns executivas. Ins stuess quintar cun dapli conflicts tranter las finamiras da protecziun e projects d'infrastructura, projects da construcziun u planisaziuns, sch'ins protegiss dapli surfatschas cun sumegliants mecanissem sco ils inventaris federals actuals.

Tar la dumonda 2: La Regenza è da la medema opiniun sco las sutsegnadras ed ils sutsegnaders, che l'agricultura muntagnarda grischuna duess avair en mira ina interacziun persistenta tranter la biodiversitad e la producziun. L'Iniziativa da la biodiversitad na porta qua nagin niz supplementar, perquai che la promoziun da la biodiversitad, la tgira da la cuntrada, l'economia d'alp, la tegnida d'animals da niz tenor ils basegns dals animals e.u.v èn aspects impurtants che l'agricultura presta gia oz. Per las consumentas ed ils consuments caracteriseschan quests aspects il purtret d'ina agricultura muntagnarda cun products d'ina qualidad spezialmain auta.

Tar la dumonda 3: Las consequenzas per l'amplificaziun da las energias regenerablas considerescha la Regenza sco main problematicas. A partir d'ina tscherta grondezza èn tals projects numnadamain d'impurtanza naziunala, uschia ch'igl è pussaivel da far ina consideraziun dals interess.

Tar la dumonda 4: Sche l'iniziativa vegniss acceptada, pudessan resutar – tut tenor la concepziun da las disposiziuns executivas – impediments pli gronds en emprima lingia per projects d'engrondiment.



En num da la Regenza

Il president:

A handwritten signature in black ink, appearing to be "J. Parolini".

Dr. Jon Domenic Parolini

Il cancellier:

A handwritten signature in black ink, appearing to be "D. Spadin".

Daniel Spadin